


Xavier de Fourvière

La Creacioun d'ou Mounde



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

PROUMIERO CONFERÈNCI

L'ESPELIDO DOU MOUNDE

Leituro de la Genèsi

Au coumençamen, Diéu créé lou cèu e la terro. Mai la terro èro vano e vuejo, e li tenèbro èron sus la fâci de l'abîme, e l'Esperit de Diéu vanegavo sus lis aigo.

MI FRAIRE E MI SORRE,

Acò 's lou coumençamen de la Genèsi. Venès de n'ausi la leituro; aro vous n'en vau douna l'esplicacioun. Sabès tóuti que la Genèsi es un libre sacra, que se capito en tèsto de la Biblo, escri pèr Mouïse sout la ditado dóu Bon Diéu.

Or, es lou proumié chapitre d'aquéu libre qu'estudiaren, dins aquest sant tèms de Caremo, chapitre meravihous ounte se parlo de la Creacioun dóu mounde. Ensemble veiren Diéu que tiro dóu noun-rèn noste vaste univers; lou veiren que coungreio la lumiero e 'svalis la sournuro, que desseparo la terro e li mar, que clavello d'astre emai d'estello lou fiermamen dóu cèu, que clafis l'èr, la terro, lis aigo, d'animau de touto meno, enfin lou veiren que formo l'ome de la limo e lou fai à soun image em 'à sa ressemblanço.

Ah! lou bèu tèmo de predicança, Fraire e Sorre!... Anessias pas vous crèire pamens qu'es un sujèt nouvèu dins la cadiero crestiano. S. Basile e soun fraire S. Gregòri de Nisso, S. Jan Bouco-d'Or, S. Ambròsi, S. Agustin e mant dóutour de la Glèiso l'an trata loungamen dins sis oumelio au pople.

Anessias pas vous crèire nimai qu'es un sujèt inutile pèr li crestian de vuei. A l'ouero que sian, la pèsto de l'ateïsme, la vanello de l'indiferènci an quasimen tout envahi. Or, en estudiant la Creacioun, qu'es lou proumier article de nosto cresèn,co, que nous mostro